

LISTOVI**GRAČANIČKI
GLASNIK**časopis za kulturnu
historijuBroj 40, godina XX,
novembar, 2015.
[str. 171-186]

© Monos 2015

Listovi gračaničkog kalendara od 1. maja do 6. novembra 2015.

Dr. sc. Omer Hamzić

07. 05. 2015.**Omladinski krug Medžlisa Islamske zajednice
Gračanica održao javnu tribinu u povodu Dana
džamija**

Tribinu je otvorio Smajo ef. Mustafić, gračanički glavni imam, podsjećajući na značaj Dana džamija, kao i predstojećeg Dana pobjede nad fašizmom, te ističući da nevolje koje se danas dešavaju Bošnjacima imaju korijene u onome što se zbivalo u našoj bliskoj prošlosti, zbog čega je potrebno učvršćivati jedinstvo i međusobno povjerenje. Ukazujući na višestoljetnu tradiciju islama u Bosni, istaknuo je da je uloga Islamske zajednice u tom pogledu i danas od velikog značaja.

Književnik i publicista Fatmir Alispahić, gost tribine, u svom se izlaganju osvrnuo na zabrinjavajuće nizak nivo kulture sjećanja među Bošnjacima, usprkos činjenici da su obrasci razmišljanja i političkog djelovanja kakvi su se uočavali i uoči agresije na našu zemlju danas možda još izraženiji, ilustrirajući to i primjerima policijske represije nad bošnjačkim povratnicima u entitetu Republika Srpska.

Još strašnije od toga, podcrtao je Alispahić, jeste činjenica da upravo zbog te niske kulture sjećanja i ignorancije među Bošnjacima, u zaštitu povratnika danas niko ne staje, čak ni verbalno. Inače, Dan džamija se obilježava u okviru Islamske zajednice prigodnim programima, u znak sjećanja na 7. maj 1993. godine, kada je srušena džamija Ferhadija u Banja Luci, biser islamske arhitekture iz XVI. stoljeća. Tokom agresije na Bosnu i Hercegovinu ukupno je porušeno 614 džamija, od toga 534 na teritoriju pod kontrolom tzv. Vojske Republike Srpske, te 80 na područjima pod kontrolom Hrvatskog vijeća odbrane.

LISTOVI

08. - 09. 05. 2015.**Festival dječjeg teatra BiH osamnaesti puta zaredom u Gračanici**

Ovo dvodnevno stvaralačko, već tradicionalno druženje djece pokazalo je visoku razinu teatarske umjetnosti koja se stvara u brojnim školama, teatrima i drugim oblicima rada s djecom, a prvi put na Festivalu su nastupili i gosti iz inozemstva, odnosno dječja grupa iz Hrvatske.

Stručni žiri Festivala nagradu za scenski govor dodijelio je ansamblu predstave "Mali princ" O.Š. "Sveti Franjo" Tuzla, dok je nagrada za ansambl igru otišla za predstavu "Ježeva kućica", O.Š. "Čengić Vila" Sarajevo. Nagrada za primjenu novih teatarskih formi u dječjem teatru uručena je za predstavu "Alisa" *Dječjeg studija Mostarskog teatra mladih 1974*, a nagrada za interakciju s publikom predstavi "Bajka o čarobnom sviraču" Sedme osnovne škole Blažuj, Ilidža. Nagradu za kostimografiju dobila je predstava "Zaigrane igracke", Amaterskog kazališta "Radoholičari" Dvor, Hrvatska, a nagrada za poruku predstave uručena je za predstavu "Čuvari planete zemlje" O.Š. "Brijesnica" Brijesnica Velika. Nagrada dječjeg žirija za predstavu u cjelini dodijeljena je predstavama "Ah, ta lek-tira" KUD "Adem Alić" i O.Š. "Hasan Kikić" iz Gračanice i "Mali princ" O.Š. "Sveti Franjo" Tuzla.

15. 05. 2015.**Na Bijelim Poljima obilježen Dan civilnih žrtava rata općine Gračanica**

Predstavnici općinske vlasti, političkih stranaka, boračkih organizacija i udruženja građana su polaganjem cvijeća na Centralno spomen-obilježje civilnih žrtava rata – sagrađeno na mjestu tragične pogibije Adema Mustajbašića, prvog civila stradalog u agresiji na Bosnu i Hercegovinu – iskazali poštovanje i sjećanje na ubijene civile sa područja općine Gračanica. Svi oni su bili žrtve planiranog

i organizovanog zločina, istaknuo je Edin Ibrišević, predsjedavajući Općinskog vijeća, koji se obratio u ime Općine, dok je Smajo ef. Mustafić, glavni imam Medžlisa Islamske zajednice Gračanica, podsjetio na važnost pamćenja i sjećanja, koje kao emanet treba prenositi na buduće generacije, ne dozvoljavajući da oni zaborave onako kao što su naše generacije zaboravljale neke ranije zločine i genocide, nespremno dočekavši ono što nas je zadesilo od 1992. do 1995. godine.

Tokom agresije na Bosnu i Hercegovinu, inače, ubijena su 194 civila, uključujući i veći broj žena i djece, dok je teže i lakše ranjenih 182.

27. 05. 2015.**Održana 31. sjednica Općinskog vijeća: dnevni red u znaku izvještaja javnih preduzeća i ustanova...**

...ali je najveću pažnju javnosti i vijećnika pobudila *Odluka o visini plaća zaposlenih u Općini Gračanica*, koja je ipak, nakon ozbiljnih primjedbi i kritike nekih vijećnika, povučena sa dnevnog reda. Potom je, kako je i predviđeno dnevnim redom, usvojena Odluka o dodjeli ovogodišnjih općinskih priznanja, te izvještaji o poslovanju nekoliko javnih preduzeća i ustanova: Općinskog pravobranilaštva, Opće bolnice, "Komusa", Vodovoda i kanalizacije i Veterinarske stanice u Gračanici. Potom su usvojene informacije: o zbrinjavanju napuštenih i izgubljenih životinja (pasa lutilica) na području općine Gračanica, o radu i vršenju nadzora općinskih inspekcija za 2014. godinu, o provedenim mjerama novčane podrške u poljoprivredi u 2014. godini na području općine Gračanica, te Program kapitalnih investicija općine Gračanica za period 2010. – 2014. godina, sa evaluacijom tog programa i ažuriranjem za 2015. godinu.

24. 05. – 02. 06. 2015.

Dani Gračanice: bogat program obilježavanja



(foto: Radio Gračanica)

U povodu 25. maja, Dana odbrane općine Gračanica, te 2. juna, Dana općine, tradicionalno se organiziraju različiti sportski, kulturni i zabavni sadržaji.

Ove godine, program obilježavanja je započeo uličnom trkom učenika osnovnih i srednjih škola u organizaciji Sportskog saveza općine Gračanica, u kojoj je učešća uzelo oko 150 takmičara (22. 05.), dok je Biciklistički klub iz Gračanice organizirao prvo državno prvenstvo u brdskom biciklizmu na hronometar, na kome je učestvovalo 48 takmičara, predstavnika 14 biciklističkih klubova – iz Tuzle, Mostara, Bihaća, Cazina, Žepča, Širokog Brijega i Gračanice (24. 05.). Narednog vikenda u Sportskoj sali Luke je održan Međunarodni turnir u ženskoj odbojci (30. 05.), na kome su, pored domaćina, učestvovala ekipe iz Doboja, Lukavca i Slavenskog Broda (prvo mjesto su osvojile Lukavčanke), a sutradan i Prvi karate kup Tuzlanskog kantona, na kome je nastupilo oko 300 takmičara iz 13 klubova. Istoga dana na području Bukve je organizirano 14. memorijalno takmičenje u amaterskoj radio-goniometriji “Nedžib Čeljo”.

Prigodnim kulturno-umjetničkim programima predstavili su se učenici Gimnazije i Mješovite srednje škole (27. i 29. 05.), kao i polaznici gračaničkog obdaništa (28. 05.). U

povodu Dana općine u prostorijama Zavičajne muzejske zbirke je otvorena izložba slika Ismeta Mujezinovića, koja obuhvata crteže, grafike i slike iz Međunarodne galerije portreta Tuzla (02. 06.), zatim promoviran novi, 39. broj “Gračaničkog glasnika” (03. 06.), te održan zajednički koncert Paralelne osnovne škole za muzičko obrazovanje i Konzervatorija za glazbu i balet iz Maribora (05. 06.).

Službeni dio obilježavanja Dana odbrane sastojao se iz polaganja cvijeća na spomen-obilježja i projekcije dokumentarnog filma o Gračanici 1992.-1995. autora Dževada Muderizovića, kao i vjerskog dijela programa (tevhid u Bijeloj džamiji).

02. 06. 2015.

Dan općine Gračanica: otvaranje novih pogona tvornice Isowood i puta Ritašići – Drama

Dan općine, 2. juni, službeno je obilježen polaganjem cvijeća, kao i svečanom akademijom, na kojoj su uručena i općinska priznanja. *Zlatnu plaketu* su primili preduzeće “Europrost” iz Miričine i KUD “Lukavica”, a *Zlatne značke*: Gazibegović Admir, Grapkić Ramiz i Imamović Husnija. Poslije akademije upriličena je svečanost puštanja u promet asfaltiranih ulica u naseljima Ritašići – Drama, te otvorenje novoizgrađenih pogona firme Isowood.

Ulica Drama, koja spaja naselja Ritašići i Hajdarevac, asfaltirana je u dužini 419, a Ulica Ritašići u dužini od 545 metara. Za asfaltiranje tih ulica uloženo je 192.248 budžetskih sredstava.

02. 06. 2015.

“Isowood” nastavlja poslovanje u novoizgrađenom proizvodnom kompleksu

Osnovana 2004. godine, ova je firma započela poslovanje sa svega troje zaposlenih, razvijajući se na lokaciji u blizini starog željeznič-

kog mosta na Spreči. Glavni proizvod bio je višeslojna (multipleks) ploča, koja se koristi u industriji namještaja. Zahvaljujući uspješnoj saradnji sa partnerima iz Holandije i dostignutom kvalitetu proizvoda, rađenih za probirljivo zapadno tržište, obim proizvodnje i broj zaposlenih se iz godine u godinu stalno povećavao. Polovinom 2014. kolektiv je brojao 56 stalno zaposlenih radnika.

U katastrofalnim poplavama, u maju 2014. godine, proizvodni pogoni "Isowooda" su teško oštećeni. Stradali su objekti, strojevi i oprema, repromaterijal, zalihe gotovih proizvoda... Po obimu štete od poplava "Isowood" je bio u vrhu ljestvice postradalih preduzeća u Gračanici.

U takvoj situaciji, bez obzira na pretrpljenu štetu, privremeno obustavljanje proizvodnje i velike troškove sanacija od poplava, procjena menadžmenta je bila da je jedino dugoročno rješenje za ovu firmu promjena lokacije, odnosno izgradnja novog pogona izvan plavne zone Spreče. Zamisao je relativno brzo realizovana, kupovinom zemljišta uz magistralnu cestu Dobož – Tuzla u istočnom dijelu MZ Stjepan Polje, površine 30.000 kvadratnih metara. Nakon izvršenih priprema, gradnja proizvodnog pogona na toj lokaciji počela je već u novembru 2014., a potpuno završena do kraja maja 2015. godine.

Novi pogoni raspolažu sa 3.000 m² proizvodnog i skladišnog prostora. Pored postojeće opreme, koja je renovirana i osposobljena nakon poplava, instalirana je i oprema za izradu sasvim novog proizvoda na prostorima cijele regije – radnih postforming ploča, koje su se do sada uvozile. U ovu investiciju firma je uložila oko 3,5 miliona KM iz vlastitih i kreditnih izvora. Bez obzira na obim pretrpljene štete, ističu u upravi firme, nisu primili nikakvu pomoć, izuzev simbolične podrške lokalne zajednice kroz oslobađanje od taksi prilikom pribavljanja papirologije za gradnju novih objekata.

I dok su se obavljale pripreme za novu investiciju, u relativno kratkom vremenu,

zahvaljujući, između ostalog i velikom zalaganju svih zaposlenih, izvršena je potpuna sanacija poslovnog prostora na staroj lokaciji od cca 5.000 kvadratnih metara u kojem je nastavljena proizvodnje multipleks ploča i pogon podova. Nakon izgradnje novih pogona, broj stalno zaposlenih radnika povećan je sa 56 na 70 radnika, rekao je direktor firme Bego Ahmetašević, prilikom svečanog otvaranja novog pogona za Dan općine Gračanica, 2. juna.

Isowood je danas skoro potpuno izvozno orijentisana firma. Svoj proizvodni program temelji na tri osnovna proizvoda: multipleks ili višeslojne ploče (bukva, topola, bukva), višeslojni podovi, masivni podovi i najnoviji – postforming ploče. Prva dva proizvoda rade se u pogonima na staroj lokaciji, a treći na novoj.

Kako su najavili iz ove firme, do kraja novembra 2015. godine na novoj će se lokaciji otvoriti još jedna proizvodna hala od 2.000 m², u kojoj će se proizvoditi radne ploče i zidne obloge u moderno opremljenim kuhinjama, čime će zaposlenje naći novi radnici.

03. 06. 2015.

"Gračanički glasnik": promocija 39. broja u Gračanici – obilježena stota godišnjica smrti Muse Ćazima Ćatića

Sadržaj ovog broja je u znaku triju značajnih obljetnica: dvadeset godina od genocida u Srebrenici, sedamdeset godina od završetka Drugog svjetskog rata, te stotinu godina od smrti Muse Ćazima Ćatića, pjesnika kome je bio posvećen i tematski dio ove promocije. Nakon pozdravnih riječi i predstavljanja sadržaja novog broja, uslijedilo je svojevrsno pjesničko veče pod nazivom "*Musa Ćazim Ćatić – vjerni rob ljepote*". O ovom velikom pjesniku nadahnuto je govorio prof. Mehmed Nurikić, a odabrane Ćatićeve pjesme i stihove recitali su članovi Dramske sekcije Udruženja mladih "Anea": Muhamed Junuzović, Tarik Džinić i Kanita Selmanović, uz



pratnju Kenana Mehića na gitari. Recitatore je pripremila prof. Fatima Bećarević, voditeljica Sekcije.

04. 06. 2015.

“RPC Superfos Balkan” Gračanica: nova investicija vrijedna 3,5 miliona eura i 50 novih radnih mjesta

Iz ove je kompanije službeno saopćeno da je Upravni odbor Grupacije donio odluku o investiranju 3,5 miliona € za izgradnju novog pogona u okviru proširenja postojeće fabrike u Gračanici. Spomenuta je grupacija u martu 2014. godine izvršila akviziciju veoma uspješne porodične kompanije “Helioplast”. Zadovoljni poslovanjem, nakon skoro godinu i po dana su odlučili krenuti mnogo dalje u pogledu investiranja, ulažući u proširenje fabrike, a samim tim i u razvoj lokalne i uopće bosansko-hercegovačke privrede. Uspjeh i kvaliteta proizvodnje i poslovanja nisu umanjile ni prirodne nepogode koje su zadesile Bosnu i Hercegovinu u maju prošle godine, u kojima su stradali i proizvodni pogoni ove kompanije, nanijevši joj iznimno veliku finansijsku štetu.

Najavljeno je da realizacija investicije započinje u junu, a izgradnja objekta već u avgustu 2015. godine. Po završetku izgradnje, koja će trajati oko godinu dana, otvorit će se 50 novih radnih mjesta na području općine Gračanica, što ukazuje na iznimnu važnost ovog projekta za lokalni rast i razvoj. Lokalna vlast će učiniti sve da hitno riješi pitanje

građevinskih dozvola i infrastrukture koja će biti u funkciji investicije.

04. - 06. 06. 2015.

Nastavnici i učenici Konzervatorija za muziku i balet iz Maribora u posjeti Gračanici

Domaćin je bila Paralelna škola za muzičko obrazovanje u Gračanici (koja djeluje pri osnovnoj školi “Hasan Kikić”), zajedno sa Udruženjem građana “Polifonija”, a radilo se o uzvratnoj posjeti, nakon što su učenici i nastavnici gračaničke muzičke škole prošle godine posjetili Maribor, gdje su između ostalog održali i zajednički koncert u čuvenoj Kazinskoj dvorani. Tridesetak učenika i nastavnika iz Slovenije predvodile su prof. Helena Meško, direktorica Konzervatorija, te lady Miloška Nott, počasna građanka Gračanice, zahvaljujući kojoj je i uspostavljena saradnja ove dvije školske ustanove.

Prvoga dana posjete za goste je upriličen obilazak Gračanice i njenih kulturno-historijskih znamenitosti, dok je drugoga dana, uz stručnu radionicu i prigodne prezentacije muzičkih instrumenata za učenike gračaničke muzičke škole, održan i zajednički koncert pod nazivom “Muzika povezuje”, u Velikoj sali BKC-a Gračanica.

Trećeg dana posjete, prije polaska natrag za Sloveniju, za goste je upriličen i izlet u Etno-avliju Mačkovac kod Banovića.

ani), a goste iz Maribora predvode prof. Helena Meško, direktorica Konzervatorija, te lady Miloška Nott, počasna građanka Gračanice, zahvaljujući kojoj je i uspostavljena saradnja ove dvije školske ustanove. Prvoga dana posjete, za goste iz Slovenije je upriličeno upoznavanje Gračanice, te kulturno-historijskog naslijeđa i tradicije ovoga grada, dok je za sutra, uz muzičku radionicu i prigodne prezentacije, planiran i koncert pod nazivom “Muzika povezuje”, koji će se održati u Velikoj sali BKC-a sa početkom u 20.00 sati. Pokrovitelji koncerta su Udruže-



nje građana "Polifonija" iz Gračanice, te lady Nott. Pozivamo ovom prilikom sve građane, poklonike kulture, da prisustvuju sutrašnjem koncertu i uživaju u nastupu učenika i nastavnika ovih dviju škola. 14. 06. 2015.

"Bugojanska maska" otišla u ruke Gračanlijama: novi uspjeh komedije "Skidajte se do kraja" mlade redateljke Mirele Trepanić iz Gračanice

Stručni žiri Festivala amaterskih pozorišta u Bugojnu, u sastavu: Nedžad Ibrahimović, Amira Kudumović i Jelena Popović, dodijelio je šest nagrada, uz dvije pohvale. Glavna nagrada, "Bugojanska maska", koja se dodjeljuje za najbolju predstavu u cjelini, pripala je predstavi "Skidajte se do kraja", u produkciji Bosanskog kulturnog centra i KUD "Adem Alić" iz Gračanice, redateljke Mirele Trepanić. Dodijeljeno je još šest nagrada – za najbolju režiju, najbolju kolektivnu glumačku igru, zatim najbolju žensku, odnosno mušku ulogu, te najbolju muziku, kao i pohvale za njegovanje omladinske scene i omladinske publike, te igru, energiju i talenat.

18. 06. 2015.

TRT Diyanet priprema dokumentarni TV serijal o životu i djelu Tajib ef. Okića

Prvog dana ramazana u Gračanici je boravila višočlana ekipa TRT Diyanet, kanala turske državne radiotelevizije posvećenog kultur-

no-vjerskim sadržajima, koju je predvodio g. Bekim Muftarević. Tokom posjete ekipa je snimila odabrane detalje iz gračaničke čaršije, za dokumentarni projekt o životu i djelu Tajiba Okića, poznatog intelektualca, alima i univerzitetskog profesora Tajiba Okića, koji je najplodnije godine svog životnog i radnog vijeka proveo u Republici Turskoj. Okić je rođen 1903. u Gračanici, u porodici Mehmed ef. Okića, muderisa Osman-kapetanove medrese – rodom iz Jajca, te Hasiba-hanume Hadžić, rođene Gračanke.

Domaćin televizijskoj ekipi je bio Smajo ef. Mustafić, glavni imam Medžlisa Islamske zajednice Gračanica, koji je gostima dao osnovne podatke o vjerskom životu u Gračanici u prošlosti, s posebnim osvrtom na djelovanje Osman-kapetanove medrese i muderiza Okića (oca Tajib ef.) u Gračanici.

Kako su autori ovog projekta putem online-izdanja časopisa "Gračanički glasnik" bili već ranije upoznati sa konkretnim aktivnostima ovoga časopisa na upoznavanju naučne i šire javnosti u BiH, pa i u Gračanici o životu i djelu Tajib ef. Okića, prezentirajući to djelo kao najbolji most za povezivanje Gračanice, prije svega, pa i Bosne i Hercegovine sa Turskom – novinari spomenute TV ekipe obavili su na tu temu razgovor i sa glavnim i odgovornim urednikom Časopisa, dr. sc. Omerom Hamzićem, koji im je dao osnovne informaci-

je o časopisu, a posebno o utemeljenju kulturno-vjerske manifestacije “Dani Tajib-ef. Okića u Gračanici”, održanoj prvi put – a nažalost, do sada i jedini – 16. 9. 2011., izrazivši nadu da će ona u budućnosti biti nastavljena.

Inače, tokom svoje posjete, gosti su ispoljili veliko interesovanje za kulturno-historijsko naslijeđe Gračanice i njene okoline kao jedan od njenih nedovoljno iskorištenih potencijala, posebno u turističke i komercijalne svrhe.

21. 06. 2015.

Gračanlija Amel Ćurić, pobjednik u finalu “X-Factor Adria”, najvećeg muzičkog natjecanja u regiji

Potvrda je to nesumnjivog talenta, vokalnih kvaliteta, ali i vlastitog truda ovog “dječaka gračaničke čaršije”, na putu do vrha, koji je 17. 12. 2003. godine ponio titulu najboljeg u finalu takmičenja super talenata u organizaciji TV Nove i OBN. U finalu “X-Factora”, održanom u Beogradu, Amela je bodrio i veliki broj Gračanlija, koji su otputovali autobusima u izuzetno povoljnom aranžmanu osiguranom zahvaljujući donacijama i pomoći gračaničkih firmi “Plamingo” i “Kovan EKoline”. Kao i prije 12 godina, i ovoga puta mu je priređen impozantan i masovan doček u središtu Gračanice (23. 06.), na kome su se predstavili i neki od njegovih kolega – učesnika spomenutog takmičenja. Nije to bio samo izraz podrške, već istinsko priznanje stanovnika Gračanice i okoline ovom talentovanom pjevaču.

24. 06. 2015.

Održana 32. sjednica Općinskog vijeća Gračanica: usvojena Odluka o broju i visini stipendija za učenike srednjih škola i studenata u školskoj 2015/2016. godini...

...a u nastavku još dvije odluke: (1) *Odluka o kriterijima za subvencioniranje i načinu nabavke sredstava i opreme potrebne za provo-*

đenje lične i kolektivne zaštite građana u individualnim i kolektivnim stambenim objektima od prirodnih i drugih nesreća i (2) Odluka o izmjeni Odluke o prijenosu prava vlasništva na nekretninama u vlasništvu Općine Gračanica. Uslijedilo je zatim usvajanje Rješenja o imenovanju člana Općinske izborne komisije Gračanica i četiri informacije: (1) o inspeksijskom nadzoru iz oblasti radnih odnosa sa brojem pregleda i poduzetim mjerama kod pravnih i fizičkih lica na području općine Gračanica u 2014. godini, (2) o aktuelnim privrednim kretanjima na općini Gračanica u 2014. godini, (3) o stanju okolice na općini Gračanica, sa osvrtnom na kantonalni plan zaštite okolice i kantonalni plan upravljanja otpadom i (4) o stanju javne rasvjete u gradu i ostalim mjesnim zajednicama na području općine Gračanica, sa osvrtnom na potrošnju električne energije.

02. 07. 2015.

“Širbegović” i “Bingo” potpisali ugovor za izgradnju trgovačkog centra “Bingo” u centru Tuzle, veličine 40.000 m².

...u kojem će biti smješteni, podzemna garaža, hipermarket “Bingo”, Cinestar, kuglana, restoran sa igraonicom, te poslovni prostori sa prestižnim svjetskim brendovima. Rok za završetak radova na montaži betonske konstrukcije je početak novembra ove godine. Riječ je o izuzetnom projektu u svakom pogledu, koji će prevazići standarde svih postojećih tržnih centara u Bosni i Hercegovini. Zato je gradnja ovog objekta prava prilika za još jednu promociju novih mogućnosti kompanije “Širbegović” i nastavak uspješne saradnje poslovne saradnje ove dvije kompanije. Za kompaniju “Bingo”, “Širbegović” je do sada izgradio veliki broj objekata širom Bosne i Hercegovine. Nedavno je završio “Bingo” centar u Bužimu, a u toku je montaža betonske konstrukcije za sličan objekat u Trebinju veličine cca 10.000 m²

“Jako sam jako zadovoljan što nastavlja-mo uspješnu poslovnu saradnju sa “Bingom”. Prema firmi “Bingo”, a posebno prema nje-nom vlasniku Senadu Džambiću gajimo ve-liko poštovanje i zahvalnost, prije svega zbog povjerenja koje su nam ukazali u vrijeme najveće krize kroz koju smo prošli. “Bingo” ima sjajan tim ljudi sa kojima ostvarujemo odličnu saradnju”, izjavio je Faruk Širbegović, vlasnik kompanije “Širbegović” nakon potpisivanja ovog ugovora.

07. 07. 2015.

Gračanički srednjoškolac Mirza Arnaut otputovao na Svjetsku matematičku olimpijadu

Na svjetsko takmičenje matematičara u Tajlandu ovaj maturant 43. generacije Gimnazije “Dr. Mustafa Kamarić” putuje sa još petero vršnjaka iz Bosne i Hercegovine, a plasman je izborio na takmičenju 37 najboljih mladih matematičara Bosne i Hercegovine. Njegov odlazak je, međutim, u prvi mah bio upitan, jer se organizator obavezao na plaćanje troškova smještaja i vize, dok su putne troškove trebali snositi sami učesnici, što porodica ovog učenika nije mogla obezbijediti. Na svu sreću, razumijevanje je pokazao kantonalni premijer Bego Gutić, koji je iz sredstava Vlade izdvojio potrebnih 2.600 KM za putni trošak, a pomoć gračaničkom matematičkom olimpijcu je stigla i od Općine Gračanica. Inače, Mirza Arnaut je ujedno i učenik generacije, koji je u toku četiri godine školovanja ostvario odličan uspjeh (sa prosjekom 5,00). Isticao se ne samo kao matematičar, već i po uspjesima u više vannastavnih aktivnosti i sekcija.

08. 07. 2015.

Promocija 39. broja “Gračaničkog glasnika” u Arhivu TK u Tuzli

Organizatori promocije su bili Arhiv Tuzlanskog kantona i Društvo arhivskih zaposlenika TK. Promotori su bili dr. sc. Omer Ham-

zić, glavni i odgovorni urednik Časopisa, te dr. sc. Izet Šabotić i dr. sc. Mirsad Kunić, profesori na Filozofskom fakultetu Univerziteta u Tuzli. Moderator je bio mr. sc. Omer Zulić, direktor Arhiva TK. Na promociji je, između ostalog, naglašen značaj i uloga Časopisa, koji ove godine obilježava dvadesetu godišnjicu svog kontinuiranog izlaženja, a zatim je dat širi osvrt na dvije središnje teme ovog broja: dvadesetu godišnjicu genocida u Srebrenici – o čemu je govorio dr. sc. Izet Šabotić, te stotu godišnjicu smrti Muse Ćazima Ćatića, o čijem je stvaralaštvu širi osvrt dao dr. sc. Mirsad Kunić.

11. 07. 2015.

Dvadeseta godišnjica genocida u Srebrenici



(foto: Radio Gračanica)

Komemorativni program je počeo tri dana ranije, tradicionalnim pješačkim pohodom “Marš mira”, u kome je nekoliko hiljada osoba krenulo iz zborničkog sela Nežuk u pravcu Potočara, gdje je za 11. juli planirana zvanična komemoracija, dženaza i ukop novih 136 žrtava genocida (među njima i 18 maloljetnika), čiji su posmrtni ostaci u međuvremenu pronađeni i identifikirani. U ovogodišnjem je “Maršu mira” učestvovao i veliki broj Gračanlija, od kojih je 75 organizirano otputovalo do Nežuka. U znak sjećanja na žrtve Srebrenice, održan je i biciklistički ultramaraton od Bihaća do Potočara, na kome je učestvovao i Gračanlija Vedad Muderizović.

Mnogobrojni stanovnici Gračanice i okoline su organizirano ili privatno otputovali u Komemorativni centar Potočare, gdje su sa oko 50.000 drugih prisustvovali dženazi i ukopu.

U samoj Gračanici Asocijacija žena SDA je organizirala memorijalnu šetnju centrom grada, kojoj se odazvao velik broj njihovih sugrađanki, bez obzira na dob i politička uvjerenja. Odjevene u bijelo, tradicionalnu boju žalosti u islamskoj i bošnjačkoj kulturi, žene su mirnom šetnjom od Sahat-kule do Centralnog spomen-obilježja 1992.-1995., te polaganjem cvijeća, učenjem Fatihe i minutom šutnje podsjetile na žrtve Srebrenice, ali i sve druge nevino stradale u agresiji na Bosni i Hercegovinu.

15. 07. 2015.

Premiuo Ramiz Šuvalić, "Zlatni ljiljan" i general Armije Republike BiH

Rođen je 1946. godine u Velikoj Brijesnici (sada općina Doboј Istok). Okončavši studije na Vojnoj akademiji, započeo je profesionalnu karijeru u Jugoslavenskoj narodnoj armiji (JNA). Isticao se kao sposoban oficir i vojni stručnjak, a bio je i nastavnik u Centru vojnih škola u Sarajevu, te Školi rezervnih oficira u Bileći. JNA je napustio uoči izbijanja agresije, u činu pukovnika, priključivši se Teritorijalnoj odbrani, kasnije Armiji RBiH.

Kao pomoćnik, a potom i zamjenik komandanta Drugog korpusa istaknuo se u neposrednom rukovođenju operacijama na najtežim ratištima, od Brčkog i Gradačca, pa sve do Olova. Uspjeh je pokazao kako u odbrani, tako i napadnim akcijama. U maju 1994. neposredno je zapovijedao i čuvenom operacijom oslobađanja Vijenca, ozloglašenog agresorskog uporišta, sa kojeg je prve dvije godine rata sijana smrt po slobodnim dijelovima općina Lukavac, Banovići, Tuzla i Živinice. Taktička grupa pod njegovom komandom (212. oslobodilačka brigada,

ojačana četom 117. brdske brigade, te 119. muslimanska brigada ojačana dijelom specijalne jedinice "Živiničke ose") tada je ostvarila sjajnu pobjedu, nanijevši teške gubitke neprijatelju i zadobivši bogat ratni plijen. Za ovaj uspjeh Šuvalić je odlikovan i najvećim ratnim priznanjem "Zlatni ljiljan", koje se dodjeljuje za iznimne poduhvate u neposrednoj borbi. Pobjeda na Vijencu je, treba podsjetiti, označila i svojevrsnu ratnu prekretnicu na prostorima sjeveroistočne Bosne, kojom započinje oslobodilačko razdoblje rata. Početkom 1995. godine Šuvalić je unaprijeđen u brigadnog generala i imenovan za pomoćnika komandanta Generalštaba Armije RBiH, a u ljeto iste godine raspoređen je na novu dužnost, u Ministarstvo odbrane RBiH, gdje ostaje sve do odlaska u penziju.

Premiuo je u Tuzli, u 70. godini života, nakon duge i teške bolesti. Komemoracija je održana u sali Narodnog pozorišta, a ispraćaj je obavljen 16. 07. ispred Komemorativnog centra u Tuzli. Ukopan je na gradskom groblju Trnovac.

01. 08. 2015.

Dženaza prim. dr. Muameru Mujčinagiću, istaknutom zdravstvenom i društvenom radniku i rukovodiocu u Gračanici.

Rođen je 1940. godine u Trebinju. Diplomirao je na Medicinskom fakultetu u Sarajevu. Radio je kao ljekar u Doboju i Tesliću, a od 1971. godine u Domu zdravlja Gračanica, prvo kao ljekar, ljekar specijalista – pedijatar, a zatim i kao dugogodišnji direktor Doma zdravlja, sve do 2000. godine, kada prelazi na rad u Ministarstvo zdravstva Tuzlanskog kantona. Istakao se kao izrazito vrijedan, sposoban i agilan rukovodilac. U svojoj struci stekao je titulu primarijusa, a bavio se i istraživačkim radom. Posebno se interesovao za područje termomineralnih voda u Gračanici, a rezultate istraživanja o njihovom utjecaju na liječenje pojedinih oboljenja objavio

je i na stranicama "Gračaničkog glasnika". tor, gdje se istaknuo kao izrazito vrijedan, sposoban i agilan rukovodilac. U svojoj struci stekao je i titulu primarijusa, a bavio se i istraživačkim radom, objavljujući i na stranicama "Gračaničkog glasnika". Ovom prigodom, u znak sjećanja, čitatelje podsjećamo na njegov stručni rad "Uticaj gračaničke termomineralne vode na model upale i na model-sisteme probavnog i genitourinarnog organskog sistema", objavljen u 5. broju našeg časopisa, sada već daleke 1998. godine. Od osnivanja Prihvatnog centra Duje, angažovao se kao ljekar u toj humanitarnoj ustanovi. Umro je iznenada, 28. 07., u turskom ljetovalištu Antalija, od posljedica moždanog udara.

01. 08. 2015.

Potpisani ugovori za izgradnju kanalizacionih kolektora

U kabinetu načelnika općine sa firmom "Euro-Asfalt" je potpisan ugovor o realizaciji projekta rekonstrukcije i proširenja sistema za prikupljanje i odvođenje fekalnih i oborinskih voda za gradsko područje Gračanice. Priprema projekta je trajala tri godine, a ukupna vrijednost ugovora iznosi 3 miliona KM. Njime je predviđena izgradnja i rekonstrukcija kolektora otpadnih voda duž desne i lijeve obale Sokoluše, zatim sekundarnih kolektora, te prioritne dionice odvodnje oborinskih voda. Planirano je da se u realizaciji ovog projekta angažuju i gračaničke firme kao podizvođači. Sredstva su obezbjeđena kroz povoljan kreditni aranžman sa Evropskom investicijskom bankom. Tehnički direktor gračaničkog "Vodovoda", Jasmin Mulavdić, koji je od početka angažiran kao stručni saradnik na projektu, istaknuo je za medije da nakon realizacije ovog projekta, u rijeci Sokoluši više neće biti kanalizacionih odvoda, čime se umanjuje opasnost od zaraze u centru grada, kao i neugodan miris koji predstavlja veliku neugodnost za građane, posebno u ljetnom periodu.

03. 08. 2015.

U Gračanici promovirana nova knjiga hafiza Sulejmana Bugarija



(foto: Radio Gračanica)

Oko tri stotine posjetitelja i redovi kupaca knjige koji čekaju na autorov potpis kod nas su rijetki prizori na promocijama novih izdanja – čak i u sredinama puno većim od Gračanice. Ipak, to se moglo vidjeti u velikoj sali BKC-a, na promociji knjige "Izr(i)jeka za raju iz Raja" h.fz. Sulejmana Bugarija, sarajevskog imama, javnog djelatnika i propovjednika, koji je svojim vedrim, pozitivnim i nadasve neobičnim pristupom vjerskim temama već odavno stekao golemu popularnost. Njegova nova knjiga, koja i u samome naslovu sadrži svojevrsnu igru riječi, zbirka je autorovih zapisa, poruka, misli i aforizama. Recenzenti i pisci bilješki uz ovo djelo su, inače, ugledni akademici, univerzitetski profesori i intelektualci: Tvrtko Kulenović, Rešid Hafizović, Dževad Jahić, Kerima Filan i Mirsad Priganica.

S ovom promocijom u Gračanici je otvorena ovogodišnja tradicionalna kulturna manifestacija "Ljetne večeri pod lipama Gračanice".

05. 08. 2015.

Kulturno-umjetničko društvo "Lukavica" u Turskoj

Nakon još jednog uspješno organizovanog međunarodnog festivala folklora, ovaj vrijedni amaterski kolektiv zaputio se na uzvratnu turneju u turski grad Gerze, na obali Crnog mora. Na ovom sedmodnevnom gostovanju, u 4 dnevna nastupa predstaviti će se sa 6 koreo-

grafija igrama iz Bosne s posebnim akcentom na folklorni izraz koji potiče iz Lukavice. Put Turske je otputovala ekspedicija od 42 člana.

07. 08. 2015.

Prigodnim programom i puštanjem u promet novoasfaltirane ceste obilježena godišnjica bitke na Visu

Centralna manifestacija obilježavanja 21. godišnjice jednog od najvećih uspjeha Armije RBiH na prostorima općine Gračanica, održana je na platou uzvišenja i izletišta Vis, a započela je svečanim postrojavanjem odreda izviđača, koji su na Vis pristigli pravcem nekadašnje linije odbrane Malešića. Uslijedila su zatim prigodna obraćanja. U ime Općine Gračanica prisutne je pozdravio načelnik Nusret Helić; o bitci na Visu je govorio Džemal Jukan, jedan od ratnih komandanata i neposrednih učesnika, dok je u ime porodica šehida i palih boraca govorila Belma Hamzić, šehidsko dijete. Prisutnima se obratio i Smajo ef. Mustafić, glavni imam Medžlisa IZ Gračanica, koji je predvodio prigodnu dovu. Program obilježavanja su uveličali i članovi omladinskih udruženja "Izvor" iz Škahovice i "Sijedi Krš" iz Babića. U okviru programa dodijeljena su priznanja i nagrade najuspješnijim učesnicima sportskih natjecanja "Vis 2015.", odigranih prethodnih dana, te svečano presječena vrpca na novoizgrađenom asfaltnom putu do Visa, čime je ovo izletište i historijski značajno mjesto dobilo kvalitetniju vezu sa centrom općine.

13. 08. 2015.

Kompanija "Širbegović" potpisala ugovor sa Britanskom grupacijom "RPC Superfos Balkan" Gračanica (ranije "Helioplast") o izgradnji novog proizvodno-skladišnog objekta c.c.a. 9.000 kvadratnih metara.

"Veoma nam je drago da su predstavnici Investitora ukazali povjerenje našoj kompaniji.

Posebno nam je važno da je Investitor jako zadovoljan kvalitetom, rokom i cijenom. Za ovaj objekat smo uradili projektovanje, a početak proizvodnje i radovi na montaži armirano-betonske konstrukcije su planirani početkom mjeseca augusta 2015." – saopštili su iz kompanije "Širbegović" (Radio Gračanica).

25. 08. 2015.

Firma "Radial" iz Stjepan Polja, novi vlasnik "Eko toplane" d.o.o. Gračanica



Postupak sanacije i restrukturiranja kreditnih obaveza u firmi "Eko toplane" koji je povela bankarska grupacija "Alpe-Adrija", kao glavni kreditor ovog projekta – po obimu najvećeg poslijeratnog stranog ulaganja u infrastrukturu Gračanice (cca 12 miliona KM) – okončan je odlukom Vlade TK. kojom se daje saglasnost privrednom društvu "Eko Toplane" d.o.o. kao nosiocu Ugovora o koncesiji za projekat snabdijevanje grada Gračanice toplotnom energijom, da 100% glasačkih prava može prenijeti sa ranijih vlasnika i osnivača firme, dvojice državljana Republike Austrije – Enesa Hamidovića (50%) i Richarda Franz Wallmanna, (50%), na privredno društvo "Radial" iz Stjepan Polja kao novog vlasnika ove firme.

Nakon što općina Gračanica nije pokazala interes da se uključi u ovaj postupak i, pod relativno povoljnim uslovima, preuzme u svoje većinsko vlasništvo ovaj komunalni objekat – najbolje uslove ponudio je "Radial", inače firma koja se do sada istakla kao jedan

od vodećih proizvođača građevinskih oplata i rezane građe na ovome prostoru, postavši tako novi stopostotni vlasnik gračaničkog centralnog grijanja.

Optimističke izjave iz te firme nagovještavaju bolje dane za "Eko toplane" i njihov dalji razvoj, te kvalitetnije snabdijevanje potrošača u Gračanici toplotnom energijom. I što je još važnije, mnogo čišći zrak koji zimi udišu Gračanlije.

31. 08. 2015.

Održana 33. sjednica općinskog vijeća Gračanica: izvještaj o Budžetu i informacija o toku izgradnje fiskulturne dvorane na Bazenu

Za prvih šest mjeseci ove godine općinski budžet je ostvaren u iznosu od 5.541.145 KM ili 94,73 %. Porezni prihodi ostvareni su sa od 97,72%, u čijoj strukturi je najveće ostvarenje na porezu za dohodak i iznosi 113,80%. Manje su ostvareni prihodi od indirektnih poreza za 3%. Neporezni prihodi su ostvareni veći za 9,45 % . Znatno veći su od plana i grantovi-potpore namjenski predviđeni za realizaciju kapitalnih projekata. Rashodi u ovom polugodištu su nešto manji od planiranih, te iznose 4.370.909 KM ili 74,72%, što je i uobičajeno za prvo polugodište–jer se nisu bili stekli uslovi za realizaciju nekih kapitalnih projekata i aktivnosti, pa se i očekuje da će biti izbalansirani u narednom periodu.

Od ostalih tačaka dnevnog reda, vrijedi spomenuti samo usvajanje Akcionog plana jačanja socijalne zaštite i inkluzije djece i odraslih u Općini Gračanica za 2015. – 2016. godinu i Informaciju o sportsko-rekreativnom centru Bazen (PKSC) u Gračanici, te aktivnostima na rješavanju problema obavljanja nastave tjelesnog odgoja u srednjim školama jer ovi materijali, sami po sebi neće promijeniti stanje u navedenim oblastima.

01. 09. 2015.

Dan formiranja 111. gračaničke brigade, novi općinski praznik – nije obilježen

Podsjećamo, na 20. sjednici Općinskog vijeća Gračanica od 29. 05. 2014. usvojena je Odluka o izmjenama i dopunama Odluke o utvrđivanju značajnih datuma na nivou općine Gračanica, kojom je službeni općinski kalendar, uz 2. juni (Dan općine), 25. maj (Dan odbrane općine Gračanica), 7. avgust (Dan pobjede na Visu), te 7. april (Dan oslobođenja Gračanice u Drugom svjetskom ratu) uveden i peti datum: 1. septembar, kao Dan formiranja 111./221. brdske gračaničke brigade A BiH.

No, izgleda da su godinu dana poslije na ovaj datum svi zaboravili, i predlagači, i općinski vijećnici (koji su spomenutu Odluku jednoglasno usvojili), i izvršna vlast, i boračke organizacije, i skoro svi lokalni mediji... Izostale su i čestitke i manifestacije i službeni program obilježavanja–čemu svjedočimo kod drugih datuma iz službenog općinskog kalendara... Što mnogo toga govori.

Inače, 111. brdska brigada je formirana 01. 09. 1992. u Gračanici, reorganizacijom dotadašnjih jedinica Teritorijalne odbrane. Brojala je ukupno 6 bataljona, sa pratećim i pozadinskim jedinicama. Sa 117. lukavačkom i 109. dobojskom je ulazila u sastav Operativne grupe 2 Drugog korpusa Armije RBiH. Početkom 1995. je preimenovana u 221. brdsku brigadu, kada ulazi u sastav novoformirane 22. divizije Drugog korpusa Armije RBiH. Osim odbrane slobodnih prostora općine Gračanice, njeni su pripadnici dali veliki doprinos odbrani naše zemlje i na drugim bojištima – od posavskog, olovskog, vareškog, pa sve do vozučkog. Brigada je dala više od dvije stotine šehida i poginulih boraca.

02. 09. 2015.**Njemačka grupacija "Elatec" otvorila fabriku za proizvodnju SIM i pametnih kartica u Gračanici**

Riječ je o jednoj od osam evropskih kompanija iz ove porodice koje danas uspješno vrše proizvodnju i personalizaciju SIM i pametnih kartica. U ovom pogonu proizvodiće se SIM kartice i pakovanja, kao i RFID čitači kartica, dok je kompanija "Elco" distributer tih proizvoda za sva tri GSM operatera u Bosni i Hercegovini, te za operatore u susjednim zemljama. Fabrika raspolaže sa najmodernijom opremom, poslovnim prostorom od 1600 kvadratnih metara i proizvoditi će dva miliona SIM kartica godišnje. U izgradnju i opremanje pogona uloženo je više od tri miliona maraka. Kako je na svečanosti otvaranja pogona najavio direktor kompanije Muamer Jarović, planirana su ulaganja još dodatnih dva miliona KM u nabavku opreme i proširenje kapaciteta.

10. 09. 2015**Tematska sjednica Općinskog vijeća Gračanica: stanje zdravstva nakon smjene direktora i stanje u školstvu na početku školske godine**

Podsjećanja radi, na osnovu Odluke Slupštine TK o preuzimanju osnivačkih prava od 15. 07. 2015. g. došlo je do imenovanja novog upravnog odbora Opće bolnice "Dr. Mustafa Beganović", koji je ubrzo razriješio dužnosti dotadašnjeg direktora dr. Almira Salkića, te za vršioca dužnosti imenovao imenovao dr. Adema Aljića. Nedugo potom (24. 08.) ministar zdravstva TK Elvis Bektić je potpisao rješenje o smjeni direktorice Doma zdravlja, Zehre Karahasanović, navodeći u obrazloženju inspeksijski utvrđene propuste i nepravilnosti. Ovaj drugi slučaj je izazvao posebne polemike u javnosti, uključujući saopćenja političkih stranka, demante Vlade, kao i različite špekulacije u javnosti (tim više što je i

sam dr. Bektić prije preuzimanja ministarske funkcije bio uposlenik Doma zdravlja).

Rasprava se, u dosta burnom tonu, sa vidljivim političkim nabojem i pozadinom, prenijela i na Općinsko vijeće. Vijećnici su se na kraju složili da su smjene direktora u gračaničkom Domu zdravlja i Općoj bolnici "neregularne", te zaključili da se od Skupštine, Vlade i premijera Tuzlanskog kantona zatraži javno očitovanje o tim smjenama i prenosu vlasništva Opće bolnice sa Općine Gračanica na Kanton.

Što se tiče školstva, zaključeno je da se od istih kantonalnih organa zahtijeva da odobre isplatu prispijelih obaveza u školama iz ranijeg perioda kao i da u Budžetu Kantona za narednu godinu predvide sredstva za pomoć školama.

14. 09. 2015.**U Stjepan Polju otvorena nova zdravstvena ambulanta i asfaltirani put Crkvine**

Projekat izgradnje ove ambulante, kako je rečeno na svečanosti povodom njenog otvaranja rezultat je uspješne saradnje između Doma zdravlja i općine koja je u ovaj posao uložila oko 120.000 KM. Za oko 3000 osiguranih u ovom selu time su stvoreni dobri uslovi za još kvalitetniju zdravstvenu zaštitu, koju će im pružati dva tima porodične medicine. U rekonstrukciju i asfaltiranje dionice lokalnog puta Crkvine, uz sredstva mještana, općina je uložila oko 50.000 KM.

13. 10. 2015.**Uz prigodnu svečanost i vatromet obilježena Nova hidžretska godina**

U akšamsko doba 13. oktobra, u 18 sati i 13 minuta, nastupio je 1. muharrem, prvi dan Nove 1437. hidžretske godine. U vjerskoj i kulturnoj tradiciji Bošnjaka, uz Novu hidžretsku godinu se veže običaj kupovine po sedam osnovnih životnih namirnica, dok su u

džamijama obično organizirani prigodni vauzovi (predavanja).

U novije vrijeme, programi obilježavanja su sve bogatiji, tako da je i ove godine Medžlis Islamske zajednice Gračanica organizirao centralnu svečanost poslije jacie-namaza u Šarenoj džamiji u Gračanici, gdje su, uz prigodan program, podijeljeni novogodišnji paketići za djecu, a upriličen je i vatromet, na radost i oduševljenje mladih uzrasta, ali i ostalih stanovnika Gračanice.

23. 10. 2015.

U organizaciji Udruženja “Gračaničko keranje” i Udruženja mladih “Sijedi Krš” obilježen Dan ašure



U velikoj sali Bosanskog kulturnog centra održan je prigodan kulturno-vjerski program, na kome su se, izvođenjem islamske duhovne muzike, predstavili: hor “Nedžm” iz Babića, hor Medžlisa Islamske zajednice Gračanica, hor Medžlisa Islamske zajednice Zvornik, Udruženje žena Pribava, te folklor-na sekcija “Dževad Halilović” iz Babića. U foajeju, ispred sale, upriličena je izložba ručnih radova članica “Gračaničkog keranja”, izložba islamske kaligrafije autorice Zane Tahirović iz Pribave, te rezbarija Alije Derviševića iz Gračanice, kao i promocija tradicionalnog jela koje se za ovaj blagdan sprema – ašure.

Blagdan Dan ašure (Jevmu-l-ašura) se obilježava svakog 10. muharrema, datuma za koji se vezuju pojedine važne epizode iz

života nekoliko Božijih poslanika. Osobito je cijenjen u sufijskoj duhovnoj tradiciji, kao dan kada je lađa poslanika Nuha nakon potopa dotakla kopno: po predaji, Nuh a.s. je tada od ostataka namirnica spravio jelo, pa je tako postala tradicija da se uoči Jevmu-l-ašure spravlja jelo od žitarica, suhog voća i orašastih plodova, s neparnim brojem sastojaka – od 7 do 77. Običaj spravljanja ašure je u islamskoj kulturi Bošnjaka bio vezan za derviške tekije, imarete (javne kuhinje), kao i privatna domaćinstva, a ova je tradicija u Gračanici oživljena zahvaljujući udruženju “Gračaničko keranje”, koje ovu manifestaciju organizuje već treći puta zaredom.

02. - 03. 10. 2015.

Održan “6. Sajam stočarstva Gračanica i Doboj Istok”

Manifestaciju je organizirala Zemljoradnička zadruga “Gračanka”, a započela je okruglim stolom posvećenim proizvodnji, izvozu i uvozu mesa i mlijeka, te ulaganjima u poljoprivredna gospodarstva, održanim u Gračanici, dok je sajamski dio organiziran u Stjepan Polju. Na okruglom stolu se raspravljalo o problemima sa kojima se suočavaju poljoprivredni proizvođači, ali i mogućnostima i šansama koje im se nude, pri čemu je posebno zapaženo bilo izlaganje Mensura Alića, direktora mesne industrije “Menprom” iz Gornje Tuzle, koji je istaknuo značaj nedavnog otvaranja turskog tržišta uvozu mesa iz Bosne i Hercegovine, radi čega je i njegova kompanija investirala u izgradnju novih pogona ukupne višemilionske vrijednosti.

Na otvorenju sajma prisutnima su se obratili predstavnici organizatora i gostiju: direktor Z.Z. “Gračanka” Rasim Husić, predsjednik organizacionog odbora Adem Džafo, predsjednik udruženja zadrugara FBiH Husejin Hasić, te još nekoliko ličnosti iz političkog života Gračanice, Doboj Istoka i Doboja. Na sajmu se predstavilo nekoliko desetaka izlagača krupne i sitne stoke, kako sa grača-

ničkog područja, tako i iz šire regije, upriličena je izložba poljoprivredne mehanizacije, a izlagali su i proizvođači stočne hrane. U kulturno-zabavnom dijelu programa nastupile su folklorne sekcija kulturno-umjetničkih udruženja iz Stjepan Polja, Škahovice i Stanić Rijeke.

14. 10. 2015.

U Gračanici po prvi put obilježen Svjetski dan pješčenja



Svjetski dan pješčenja (*World Walking Day*) se svakog oktobra obilježava širom svijeta, u organizaciji međunarodne asocijacije TAFISA – koja, djelujući u više od 150 zemalja, promovira masovno bavljenje sportom. Svrha i cilj ove manifestacije upravo i jeste da potakne rekreaciju građana, kroz pješčenje kao fizičku aktivnost koja donosi veliku korist i dobrobit za čovjekovo zdravlje. Ove je godine po prvi put obilježena i u Gračanici, u organizaciji Biološko-ekološke sekcije Mješovite srednje škole i Udruženja EKO-lideri Gračanica. Oko pedesetak učenika škole je, skupa sa građanima koji su im se pridružili, krenulo iz Gračanice pješćom rutom u dužini od oko 13 km, preko Drijenče, Lendića, Zečevog Gaja i Golaća do centra Malešića, te preko Fazlija (Babići) i Babića natrag do Gračanice.

Prije polaska, učesnicima se kratko obratio prof. Šefik Hasić, voditelj sekcije, te učesnik Kerim Grbić, koordinator akcije i predsjednik Vijeća učenika Mješovite srednje

škole. Na Zečevom Gaju, poprištu poznate bitke od 25. maja 1992., kao i na kulturnome mjestu Kamen u Golaćima, za posjetitelje je upriličen i kratak “čas historije”, a o značaju ovih mjesta je govorio prof. Edin Šaković, član redakcije *Gračaničkog glasnika*.

04. 11. 2015.

Obrazovnim ustanovama na općini Gračanica omogućeno da učestvuju u reciklaži ambalažnog otpada

U krugu Javnog komunalnog preduzeća “Komus” izvršena je svečana primopredaja kanti za odvojeno odlaganje ambalažnog otpada, koje će biti postavljene u sve dječje vrtiće, te osnovne i srednje škole na području općine.

Općina Gračanica je, inače, jedna od prvih lokalnih zajednica u Bosni i Hercegovini koje su potpisale ugovor o saradnji sa neprofitnom kompanijom “Ekopak”, pridruživši se tzv. Sistemu Zelene tačke – programu reciklaže i iskorištavanja ambalažnog otpada. Ova je kompanija do sada uložila oko 50.000 KM u projekte na ovoj općini, kroz sufinansiranje uređenja površina, postavljanja tzv. “eko-otoka” i kupovinu vozila za odvoz prikupljenog ambalažnog otpada, dok je “Komus”, kroz razdvajanje i poseban odvoz ambalažnog otpada iz domaćinstava, do sada prikupio i na reciklažu uputio oko 65 tona plastike i papira.

Nabavkom posebnih kanti za sve vrtiće, osnovne i srednje škole, ovaj korisni program je proširen i na obrazovne institucije, čime se želi povećati i svijest mladih generacija o značaju reciklaže i iskorištenja ambalažnog otpada.

29. 10. 2015.

Održana 35. sjednica Općinskog vijeća

Od ukupno 10 tačaka dnevnog reda, najviše pažnje vijećnika su privukle dvije koje se odnose na budžet: Izvještaj o izvršenju budžeta

općine Gračanica za prvih 9 mjeseci 2015. godine, te nacrt budžeta općine Gračanica za 2016. godinu, koji je usvojen i upućen u javnu raspravu.

06. 11. 2015.

**Nova multimedijalna sala u
gračaničkoj Mješovitoj srednjoj školi**



(foto: Radio Gračanica)

U vrijeme dok se znatan broj srednjih škola na području Tuzlanskog kantona suočava sa

problemom nedostatka ili neuvjetnog prostora, Mješovita srednja škola u Gračanici je predstavila novouređenu multimedijalnu salu, koja će značajno doprinijeti unaprijeđenju nastavnih i vannastavnih aktivnosti škole. Prisutni gosti, među kojima su bili i kantonalni ministar obrazovanja, nauke, kulture i sporta Izet Jagodić, te kantonalni ministar prostornog uređenja Hasan Fehratović, skupa sa načelnikom općine Nusretom Helićem, upoznati su i sa obnovom sportske sale nekadašnjeg DTV "Partizan", u kojoj još uvijek nastavu iz tjelesnog odgoja obavljaju kako učenici Mješovite srednje škole, tako i Gimnazije. Direktor Mješovite srednje škole Osman Bukvić je istaknuo da je škola u ove projekte uložila preko 170.000 KM vlastitih sredstava, uz pomoć donacija od privrednika, te pomoći viših nivoa vlasti. Gosti su također imali priliku pogledati promotivni film škole, izložbu učeničkih radova, a potom je upriličen i obilazak obnovljenih prostorija sportske sale.